

# Nama Reti Kristen?

## BAGI KE TIGA

### Kitai ENDA TAU ENDA bisi sulu kaul enggau TUHAN!

Udah kitai nyadi siku ari orang Kristian, kitai enda tau enda ngaga kaul enggau Tuhan ngena jalai ka bisi pemendar.

1. Begempuru besembiang bebala mayuh enggau raban ti bukai ( **SPKR 1:14**). Rajin belajar ari ketua gerija ti bepenemu pasal Injil ( **SPKR 2:42**). Kitai deka nemu nama utai dipadah ka Tuhan ngagai kitai ba dalam Bup Kudus. Kitai naka ulih ngingat ka ajar ari Bup Kudus, ngena chara ka nyamai diperati tauka dikingat ka kitai, sereta mudah dipeda, ( **Ulang Adat 11:18-20**); <sup>18</sup>*Simpan pesan tu dalam ati enggau pikir kita. Tanchang iya ba lengan, lalu lekat ka ba kening kita nyadi ka pengingat.* <sup>19</sup>*Ajar pesan tu ngagai anak kita. Bekenang ka iya lebuh kita di rumah, enggau kini penunga kita bejalai, lebuh gali enggau lebuh kita dani.* <sup>20</sup>*Tulis iya ba tiang pintu rumah enggau pintu kota kita.*
  - a) TUHAN ukai ngajar ngasuh kitai enda tau enda ngelekat ka pesan IYA ba sebelah tubuh tauka sebelah bilik. IYA meri pesan ngasuh kitai nguji ngingat ka jaku ajar IYA ngena chara ti ulih dikingat ka kitai. Awak ka kitai selalu ulih besemak enggau Allah Taala, idup beteladan ka Jaku IYA ninting hari enggau idup ulih iring Jaku IYA. Tu peransang Allah Taala dikena kitai tau ngingat ka jaku ajar IYA, awak kitai selalu ingat sereta bisi penangi. Nadai salah kitai ngelekat ka jaku TUHAN ba sebelah dinding rumah awak ka nya tau ngias bilik kitai, ari kitai ti ngelekat utai sengapa ti nadai tuju.
  - b) Nguji selalu bekenang ka ajar dalam Bup Kudus ngagai anak kitai, nadai pilih maya kitai bisi peluang. Anang ngena peluang ka bisi ngereja pengawa ti nadai menuku enggau nadai tuju.
  - c) Tu meh siti chara kitai amat rindu ka Allah Taala (Matthew 22:37), ianya selalu berati ka Jaku IYA ninting hari.
  - d) Begempuru sembiang mega (SPKR 1:14), nya jalai ti tau ngering ka diri sama diri. Barang pangan ti agi lemi, iya tau bulih pengering ari sukong orang ti udah tegap. Lebuh kitai begempuru enggau sida ti bepenemu pasal Injil, dia kitai jampat mereti ka leka jaku ti ditulis dalam nya. Awak ka penemu ti ulih kitai ari sida ka udah tegap, tau dikenatai ka kitai ngagai orang ti bedau ngelala TUHAN.
2. Belajar ka Bup Kudus tauka Jaku Tuhan  
Bup Kudus tu endang bepun ari Allah Taala, ti dikena kitai ngelala penyai enggau pemadas, ( **2 Timoti 3:16-17**). Laban pesan dalam Bup Kudus, ukai nitih ka peneka mensia. Tang mensia ti nusoi pesan Allah Taala, endang ulih kuasa Roh Kudus, ( **2 Peter 1:20-21**).
  - ☞ Bup Kudus ukai jerita ti di tusoi ari turun menurun (disambung ari serak siti ngagai serak siti) tauka ensera, tauka jerita aki ini, tauka ngenang pasal TUHAN ti datai ari runding ti digaga mensia empu. Iya ukai bup mensia. Tang nengah mensia ti di kuasa Roh Kudus, TUHAN mandang ka sapa IYA ti bendar enggau langgur IYA ngagai orang ti arap. Runding sida ti nulis endang

## Nama Reti Kristen?

ari baruh kuasa Roh TUHAN, awak ka sida tau nulis tauka nusoi utai ti amat pasal Allah Taala, ti pengaga semua utai. Bup Kudus endang amat tau dikarap, laban nya bepun ari Allah Taala, lalu TUHAN empu ti ngatur utai ti patut ditulis, awak ka kitai tau bisi pengarap ngagai IYA.

3. Selalu besembiang, maya kadiri (**Matthew 6:6**) tauka bebala mayuh dikena meransang pangan diri (**SPKR 1:14; Hebrew 10:25**) . Besembiang enda tau enda minta dalam nama Jesus, (**John 14:13-14**). Enti besampi anang anang sengapa nyebut nitih ka peneka ti enda patut, (**Matthew 6:7; James 4:2-3**). Minta enggau ati ti baruh sereta anang minta enggau ati ti bisi pengamu.

Sembiang tu tau dibagi kitai ngagai lapan bengkah;

- i. Seput kitai dalam Tuhan, baka kitai ti enda tau enda makai enggau ngirup.
- ii. Sulu kaul enggau Tuhan
- iii. Piring kitai ngagai Tuhan
- iv. Tanda kitai ngasi tauka nangi ka Tuhan
- v. Tanda kitai muji enggau nyembah Tuhan
- vi. Chara kitai minta tolong ari Tuhan dikena ngelempung ka penanggung
- vii. Dikena ngelaban roh ti jai sereta ngenyauh ka kitai ari penguji
- viii. Dikena kitai ngering ka orang bukai

4. Selalu datai enggau orang belajar ka Bup Kudus, enti gerija bisi ngatur kelas mansang dalam Kristus. “... *Sida mending ka jaku Tuhan enggau bendar, lalu genap hari sida belajar ka Bup Kudus, berarti ka jaku dalam nya, sakali ka utai ti ko Paul nya amat*” (**SPKR 17:11**).

☞ Bakani kitai tau berarti lalu mida pasal jaku ajar enggau jaku kungsi ka ditusoi paderi tauka penginjil? Kitai enda tau enda muka Bup Kudus lalu macha iya, sakali ka utai ti ditusoi sida paderi enggau penginjil nya betul. Ukai semina nya, kitai mega patut mansik enggau dalam agi, ngena bup tauka bup penerang ka tau dikarap ka bisi dijual ba kedai tauka ti di engkah ba ‘internet’. Selalu manding ka utai ti didinga kitai ngagai Bup Kudus. Paderi enggau penginjil ti meri penerang pasal jaku Tuhan, sida iya tentu enda nerang ka utai ti tau mai kitai tesat tauka limpang ari utai ti udah dipadah ka dalam Bup Kudus.

5. Selalu magi pemisi (duit) diri ngagai gerija dikena ngemansang ka Perintah Tuhan, enggau meri sida ti umang enggau ati ti gaga. Genap iko orang patut meri nitih ka peneka iya (pemutus runding iya empu), ukai ulih pejal enggau kategal pedis ati (ngesal udah meri), laban TUHAN rindu ka orang ti meri enggau gaga ati, (**2 Korint 9:7**).

☞ Genap iko kitai ti nyadi orang kristian patut magi reta tengkora (duit) enggau pematut nitih ka dikerindu ka Tuhan enggau nadai belampung ati (ati ti tunggang), awak Perintah Tuhan (gerija) di dunya tu tau mansang ngerembai. Sua kitai agi kakang ati deka meri enggau ati ti gaga ngagai TUHAN (pemerik ba gerija). Laban kategal ti agi bisi pengirau enggai ka belanja ti agi tinggal enda chukup datai ba maya ka tau bulih baru. Kitai ti meri patut bepanggai ba pengarap ti tulin, ukai enggau ati ti kakang.

## Nama Reti Kristen?

6. Ngembuan pendiau pengidup ti selalu diau dalam pemaik (**Galatia 5:22-23**); Pengerindu, Pengaga, Pemaik, Pengeliat Ati, Penelap, Pemadas, Pamaruh Ati enggau Penagang tubuh enggau runding.

☞ Tu meh buah pengidup ti patut dikembuan kitai orang kristian. Buah pengidup ti datai ari Kristus, ti patut di kembuan kitai. Enti sema sekeda buah nya bisi dalam pengidup kitai, enti nadai ari bantu Kristus utai nya enda nyadi manah (rumbau). Enti kitai deka ka buah pengidup ti manah, kitai enda tau enda bejantil ka pengidup kitai enggau Kristus, ianya mengkang dalam Iya (**John 15:4,5**). Kitai enda tau enda rindu ka Jesus, ingat ka Iya, sereta nunda chara Iya. Pengujong, kitai tau bulih utai ti dikerindu ka TUHAN, ti ngamat ka Sempekat IYA enggau kitai; ianya rindu ka Allah Taala sereta enggau orang bukai.

**Udah tu peda BAGI Ke Empat – Rindu Ka menyadi Enggau Pangan Diri.....**